

Date – 07/05/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. All India Radio kum 90 tlin lawmna pualin tukin khan AIR Aizawl chuan a huhoa ke a kal, Walkathon a huaihawt.
2. Aizawl Mayor Pu H. Lalremtluanga'n bultan thar tur an nih angin engkim tharlam taka kalpui an tum dawn thu a sawi.
3. Larsap, General (Retd) Vijay Kumar Singh a'n nimin khan Kelsiha Tribal Research Institute leh Ropuiliani Tribal Freedom Fighters Museum a tlawh.
4. Union Labour and Employment Minister Dr Mansukh Mandaviya chuan kum 40 chunglam thawktutetan labour code thar, kumtin a thlawna hriselna endikna programme a hawng.

<><><>

AIR 90 YEARS WALKATHON

All India Radio kum 90 tlin lawmna pualin tukin khan AIR Aizawl chuan a huhoa kea kal, Walkathon a huaihawt a, AIR Station Tuikhuahtlang atanga Millennium Centre thleng a huhoin kein thawktute leh lo thawk tawh thin bakah mipui thahnem tak an kal.

Walkathon vailiamtu All India Radio Aizawl Director leh Mizoram Cluster Head Pu DR Lalropuia chuan All India Radio ngaihlu tu bakah All India Radio-a thawk mek leh thawk tawh thahnem tak an kal khawm chu lawmawm a tih thu a sawi a. All India Radio lungphum, mipuite aw, mipuite lungphu an nihna chu India in zalenna a hmuh hma kum 11 daih tawh atangin lungphum chu a intan tawh tih a sawi a, tha thlah loin an kalpui zel tih lantir nan walkathon chu buatsaih a nih thu a sawi a ni.

All India Radio kum 90 tlin lawmna pual hian AIR Aizawl chuan hun pawimawh hrang hrang buatsaihin a khuh hawn nan Lamp Lighting bakah 90 Years Musical Concert te a buatsaih a, Walkathon hi Aizawl mai nilo District dangah pawh buatsaih a ni.

All India Radio hi June 8, 1936-ah din niin, New Delhi-ah Headquarters a awm a; AIR Aizawl hi India ram puma AIR Station 230 zinga pakhat niin, AIR kum 90 tlin pual hian AIR Aizawl chuan a lawmnapui ber hi June ni 8, 2026 khian Vanapa Hall-ah Chief Minister Pu Lalduhoma hovin an hmang dawn a ni.

<><><>

POLICE PRESS STATEMENT

All Women Police Station, Aizawl chuan FIR an dawn bawhzuiin Mizo hmeichhia, tihluhnaa nawhchizawrh tir chhanchhuah an nih thu an sawi.

All Women Police Station thuchhuahah tun thla ni 1 khan Mizo hmeichhe pakhat hnen atangin FIR an dawng tih sawiin FIR-a a ziah danin amah leh a thiannu chu Beauty Queen Salon & Spa, Rudrapur, Uttarakhand ah thla khata Rs. 20,000/- hlawha thawhna tur a awm tih hriain, he hmuna thawk tur hian nikum October thla khan an kal thu an sawi a. An thlen chuan hlawh an hmuh theihna tur chuan mipat hmeichhiatna (extra services) an tih tel ngei a ngai thu hrih an nih mai bakah ni khatah dawrtu mi pathum atanga pakua zet neih luihtir an nih thu an sawi a. Dawrtu tur an neih dawn hian an duh lo chung zu leh ruihhlo chi hrang hrang pe a hrai ruih thin an nih thu an sawi a. Hetiang hnuah pawh hian an hlawh tura an tiam chu pek an nih ngai loh thu sawiin an tlan chhuah theih loh nan talaa gate an kalh hnan thin thu an sawi a. Thla hmasa ni 4-ah tuboh leh chheni hmanga chhu chhiain an tlan chhuak thei hram tih sawiin thla hmasa vek ni 7 ah Aizawl lo thlengin FIR an thehluh tak thu an sawi a.

He report zulzui hian All Women Police Station-ah Immoral Traffic (Prevention) Act, 1956 leh Bharatiya Nyaya Sanhita (BNS), 2023 hnuaiyah thubuai ziah luh a nih thu police te chuan sawiin chak zawka he case hi chhui a nih theih nan Special Investigation Team (SIT) pawh din nghal a nih thu an sawi a. Mizo hmeichhe dang pawh he hmuna la tang mek an awm tih hriain chhanchhuak tur leh thilsual titute chungga dan anga action lak a nih theih nan Mizoram Police team leh Women and Child Development Department hnuaiya thawktute chuan tun thla ni 4 khan Rudrapur, Udham Singh Nagar District, Uttarakhand an pan thu an sawi a. A tuk ni 5 khan Rudrapur Police-te nen Mizo hmeichhiate thawhna hmuna Beauty Salon & Spa hi luhchhuah niin Mizo hmeichhia panga la hren beh te chu chhanchhuah an nih thu leh an zingah hian kum tling lo pahnih an tel bawk thu an sawi a. Special investigation team te chuan Rudrapur Police Station-ah thubuai dang ziaak lut lehin thil sual titute, leh nawhchizawrhnaa inhnawhmi mi paruk(6) te chu man an nih thu an sawi a. Heng an mi mante zingah hian a bultumtu leh Spa neitu ni bawk, hnam dang leh a kawppui Mizo hmeichhia bakah a laizawnnu an man tel tih an sawi a. Pawikhawihna tuartu Mizo hmeichhia chhanchhuah takte enkawl mek an nih thu an sawi bawk a ni.

<><><>

AMC

Aizawl Mayor Pu H. Lalremtluanga'n an Manifesto behchhanin hmalak hmasak tur an zirchiang dawn a, bultan thar tur an nih angin engkim tharlam taka kalpui an tum dawn a ti.

Aizawl Mayor chuan AMC chu kum 15 a kal chhungin hruaitu hmasate theihtawp chhuahna hnuaiah hna tam tak thawh niin, an thlen chin pawh hmuh theihin a awm a ti a, ennawn leh siamthat ngai tam tak a awm rualin, a tha sa rin nawn tur pawh a awm a ti a, chung chu officer te nen en hovin hmalak an tum a ti a.

Tun atanga reiloteah thutkhawm pawimawh kovin, mipuite hnena an manifesto semchhuah te zirchiangin ngaih pawimawh hmasak tur te an en dawn a ti a, bultan thar tur an nih angin engkim tharlam taka kalpui an tum dawn tih a sawi a ni.

Aizawl Municipal Corporation (AMC) Corporator atana thlan tharte hi nimin khan Thuampui Venga AMC Office, BoC Meeting Hall ah Aizawl DC Pu Lalhriatpuia'n rinawmna thu tiamtirin a lalut a.

Corporator 19 te lakluh zawh hian Mayor leh Deputy Mayor te thlan an ni a. Aizawl Mayor tura thlan Pu H. Lalremtluanga (Ward-VI) leh, Deputy Mayor tura thlan Pi R. Lalawmpuii (Ward-XVI) te bakah Executive Corporator pali- NI. Christina Roluahpuii Sailo (Ward-VIII), Pu Vanlalhruaia (Ward-XIII), Pu Vanlalfaka (Ward-III), Pu K. Lalrodinga (Ward-XVIII) te chu rinawmna thutiam tira lakluh nghal an ni.

AMC corporator lakluh inkhawmah hian Chief Minister Pu Lalduhoma, Home Minister Pu K. Sapdanga leh Speaker Pu Lalbiakzama te bakah Minister leh MLA dangte an tel a ni.

<><><>

UNION MoS

Union Minister of State for Petroleum & Natural Gas and Tourism Pu Suresh Gopi a'n nimin khan Kolasib a tlawh a, DC Conference Hall, Kolasib-ah district chhunga sawrkar department hrang hranga hotute a kawm.

Union Minister chuan ram hmasawmna tura chhiarpui (census) neih pawimawh zia sawiin, chhiarpui chu mipuite dinhmun leh nihna dik tak hriatchianna a nih avangin, ram hmasawmna tura sawrkar ruahmanna siam nan a pawimawh em em a ni, a ti.

Mizoram inkalpawhna tha zawk, a bikin rel kawng tha tak a nei chho mek chu lawmawm a tih thu a sawi a. Kawlphethaa intodelh turin hydro-electric project tam zawk neih theih dan ngaihtuah a pawimawh thu a tarlang bawk.

Zirna lam pawimawhna tarlangin Minister chuan, Kendriya Vidyalaya (KV) neih a pawimawh zia a sawi a. Mizoram pumah KV pakhat chauh a awm chu pawh a tih thu sawiin, KV a tam zel theih nan MP te hnena thlen nise a ti a. Hmeichhiate zirna chuan ram hmasawmnaah kawngro a sut thui thu sawiin, nursing lamah te pawh tam zawka an kal theih nana hmalak a pawimawh a ni, a ti.

DC Conference Hall-a hun an hman zawh hian Union Minister Pu Suresh Gopi hian Bukvannei-a Oil Palm Processing Mill chu a hmunah a tlawh a, hetah hian oil palm chingtute nen an inkawm a ni.

<><><>

GOVERNOR

Larsap, General (Retd) Vijay Kumar Singh-an nimin khan Ministry of Tribal Affairs hnuai sak Tribal Reserch Institute (TRI) leh Ropuiliani Tribal Freedom Fighters Museum (RTFFM), Kelsiha hnathawh mekte a tlawh a,

Larsap chuan hnam ziarang, nunphung leh tihdante ngaihhluta vawnhim a pawimawh takzet thu sawiin, Tribal Reserch Institute leh Ropuiliani Tribal Freedom Fighters Museum-te chu tangkai taka hman tura siam a tul thu a sawi a. Khualzin, zirlai leh zirbingmite tana tlawh man hla ni tura thil tha duang turin line department-te a chah a. Tribal hnam ziarang leh Mizo chanchinte awmze nei taka pholan a nih theih nan hun bituk siama hawmfel hma ngeia a nih dan tur dik tak a nih thei nana theihtawp chhuah turin a chah bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

HRIATNA MIZO CHATBOT

Mizo tawng bik atan a duan, Mizo AI hmasa ber, “Hriatna Mizo Chatbot” MizoMade siam chu nimin khan hlawhtling taka enchhin a ni.

India-ah pawh hetiang model hi a hmasa pawl a ni a. He model hian tun dinhmuna Google, Facebook leh model dang Gemini leh Meta ten an tih theih loh, Mizo tawngka a biak theih a rawn nei tawh a. He feature hi May ni 18 atangin a hman theih dawn a ni.

He application hian, model lo awm tawh ten an tih theih loh leh an phak loh a rawn ti thei tura beisei a ni a, thu chhut, text based chauh ni lo audio based interaction an tih, aw hmanga thunun te pawh a theih tawh a ni.

Mizo mipui ten an tangkaipui zawk theih nan tih changtlun zel tum a ni a. Hriatna Mizo Chatbox hi iOS app store (iPhone) leh Google play store ah te download theihin a awm a. Version 1.0 hi 2023 khan released tawh niin, tunah hian sorkar laipui hmalakna Bashini ni pah fawmin tih changtlun mek zel a ni.

He application hi Mizo-te tana siam a nih angin, Mizoram chhunga cheng Mizo expert team te siam a ni a, AI leh Linguist mithiamte pawh Mizo vek an ni.

<><><>

UNION LABOUR MINISTER

Union Labour and Employment Minister Dr Mansukh Mandaviya chuan nimin khan New Delhi a Employees state Insurance corporation Medical College and Hospital ah kum 40 chunglam thawktutetan labour code thar kumtin a thlawna hriselna endikna programme a hawng.

Dr Mandaviya chuan Thutharlakhawmtute hma ah labour code hian kum 40 chunglam hnathawkte chu kumtin athlawna health checkup an neih theihna tur a nih thu sawiin, thawktute chu hriselna endikna hmanrua a tam thei ang ber hmang tangkai tur leh an hriselna leh hamthatna te ngaipawimawh turin a chah a ni

<><><>

UNION EDUCATION MINISTER

Union Education Minister Dharmendra Pradhan chuan nimin khan New Delhi ah India a Netherlands Ambassador Marisa Gerards hmuin, ram pahnihte thawhdun dantur kawng hrang hranv an sawi dun.

Minister chuan India leh Netherlands chu zirna leh research lam ah hma thar lak dan tur hrang hrang te, hydrogen, semiconductor, Artificial Intelligence, agriculture leh khawpui tih hmasawna kawng ah te hmalakna kalpui anih tur thu a sawi bawk.

<><><>